

Reglur um framlög úr Jöfnunarsjóði sveitarfélaga til eflingar tónlistarnámi og jöfnunar á aðstöðumun nemenda

1. gr.

Gildissvið og markmið

Reglur þessar gilda um ráðstöfun á árlegu framlagi úr ríkissjóði í Jöfnunarsjóð sveitarfélaga og um úthlutanir framlaga sjóðsins til sveitarfélaga vegna kennslukostnaðar í tónlistarskólum, sbr. samkomulag ríkis og sveitarfélaga frá 13. maí 2011 um eflingu tónlistarnáms og jöfnun á aðstöðumun nemenda.

Framlagi ríkisins er ætlað að gera nemendum kleift að stunda tónlistarnám óháð búsetu og efnahag með því að standa straum af kennslukostnaði í tónlistarskólum vegna hljóðfæranáms á framhaldsstigi og söngnáms á mið- og framhaldsstigi ásamt tengdum kostnaði, þ.e. hlutdeild í stjórnunarkostnaði og hljóðfæragjaldi. Skilyrði er að um sé að ræða tónlistarnám í viðurkenndum tónlistarskóla, þ.e. skóla sem kennir samkvæmt aðalnámskrá tónlistarskóla og nýtur viðurkenningar mennta- og menningarmálaráðuneytisins.

Eftir því sem fjárveitingar leyfa er Jöfnunarsjóði sveitarfélaga að auki heimilt að veita sveitarfélögum framlög vegna kennslukostnaðar nemenda á grunnstigi í söng og á grunn- eða miðstigi í hljóðfæragreinum, sem þurfa af gildum ástæðum að sækja tónlistarskóla utan síns sveitarfélags, eftir því sem nánar er kveðið á um í reglum þessum, sbr. 7. gr.

Tónlistarskólum er óheimilt að krefja nemendur sem reglur þessar ná til um hlutdeild í kennslukostnaði.

2. gr.

Framlag úr ríkissjóði

Á grundvelli samkomulagsins frá 13. maí 2011 eru til ráðstöfunar á ársgrundvelli 480 m.kr. Framlagið greiðist til Jöfnunarsjóðs sveitarfélaga með jöfnum mánaðarlegum greiðslum, 40 m.kr. í hvert sinn.

3. gr.

Umsóknir sveitarfélaga

Að loknu innritunartímabili að vori skulu tónlistarskólar senda því sveitarfélagi, þar sem skóli starfar, skrá um alla nemendur sem innritaðir eru í tónlistarnám sem fellur undir reglur þessar, til að sveitarfélagið geti sótt um framlag úr Jöfnunarsjóði sveitarfélaga vegna þeirra nemenda sem þar munu stunda tónlistarnám. Falli tónlistarnám nemenda undir 7. gr. reglna þessara ber tónlistarskóla að senda lögheimilissveitarfélagi skrá um þá nemendur, sbr. ákvæði í 3. mgr. 7. gr.

Sveitarfélögum ber að skila umsóknum um framlag vegna næsta skólaárs fyrir nemendur skv. 2. mgr. 1. gr. til Jöfnunarsjóðs sveitarfélaga fyrir 15. júní ár hvert á sérstökum eyðublöðum sem nálgast má á vefsíðu sjóðsins, sbr. þó ákvæði til bráðabirgða.

Umsókn um framlag samkvæmt 3. mgr. 1. gr., sbr. 7. gr., skal berast Jöfnunarsjóði sveitarfélaga frá lögheimilissveitarfélagi nemandar eigna síðar en 15. júní ár hvert vegna næsta skólaárs.

Eigi síðar en 15. september ár hvert skulu tónlistarskólar senda viðkomandi sveitarfélagi endanlega nemendaskrá. Skulu þær upplýsingar berast jöfnunarsjóði eigna síðar en 20. september.

Ef upplýsingar skortir frá einstökum sveitarfélögum eða tónlistarskólum um innritaða nemendur verður ekki úthlutað framlagi vegna þeirra nemenda sem þar stunda nám á næsta skólaári. Ef dráttur verður á því að upplýsingar um endanlega nemendaskrá berist frá sveitarfélagi er jöfnunarsjóði heimilt að fresta greiðslu þar til úr hefur verið bætt.

4. gr.

Framlög úr Jöfnunarsjóði

Þegar upplýsingar liggja fyrir um fjölda innritaðra tónlistarnemenda á næsta skólaári, sbr. 3. gr., birtir Jöfnunarsjóður sveitarfélaga viðmiðunarfjárhæðir eftir tegund tónlistarnáms og námsstigi:

- a. Viðmiðunarfjárhæðir vegna tónlistarnáms sem fellur undir 2. mgr. 1. gr. skulu taka mið af áætludum meðalkostnaði vegna nemenda á hverju námsstigi og því fjármagni sem er til ráðstöfunar skv. 2. gr.
- b. Viðmiðunarfjárhæðir vegna tónlistarnáms sem fellur undir 3. mgr. 1. gr., sbr. 7. gr., taka mið af áætludum meðalkostnaði vegna nemenda á hverju námsstigi.

Úthlutanir framlaga til sveitarfélaga taka mið af innrituðum fjölda nemenda og því námi sem stundað er, samkvæmt því sem fram kemur í umsókn sveitarfélagsins, að teknu tilliti til viðmiðunarfjárhæða, sbr. 1. mgr. Um jafnar mánaðarlegar greiðslur verður að ræða á skólaársgrunni, þ.e. á tímabilinu september til ágúst., sbr. þó ákvæði til bráðabirgða. Greiðsla skal berast til sveitarfélaga síðasta dag hvers mánaðar.

Upplýsingar um áætlud framlög fyrir næsta skólaár skulu liggja fyrir eigi síðar en 15. júlí, sbr. þó ákvæði til bráðabirgða.

Þegar upplýsingar hafa borist til jöfnunarsjóðs um endanlegan nemendafjölda, sbr. 3. mgr. 3. gr., skal sjóðurinn yfirfara forsendur viðmiðunarfjárhæða og framlaga til einstakra sveitarfélaga. Ef um breytingar er að ræða skulu þær tilkynntar sveitarfélögum fyrir 31. október.

5. gr.

Skilyrði fyrir úthlutun framlaga og greiðslu

Tónlistarskólar skulu senda skilagrein til viðkomandi sveitarfélags um liðið skólaár fyrir 15. júní ár hvert á eyðublaði sem Jöfnunarsjóður sveitarfélaga útbýr. Þar skulu m.a. koma fram upplýsingar um fjölda nemenda á hverju námsstigi eftir tegund náms og upplýsingar um nemendur sem þreyttu áfangapróf. Sveitarfélag ber ábyrgð á að skilagreinar frá tónlistarskólum sem þar starfa berist til Jöfnunarsjóðs sveitarfélaga eigi síðar en 1. júlí ár hvert.

Skilyrði þess að framlag verði greitt á grundvelli þessara reglna er að skilagrein um ráðstöfun framlags síðasta skólaárs og upplýsingar um innritun nemenda hafi borist Jöfnunarsjóði innan þess frests sem fram kemur í þessum reglum.

Komi í ljós við yfirferð skilagreina frá sveitarfélögum, sbr. 1. mgr., að um ofgreiðslu eða vangreiðslu framlags hafi verið að ræða á liðnu skólaári skal gerð leiðrétting áður en kemur til lokagreiðslu framlags fyrir viðkomandi skólaár, eða, ef því verður ekki viðkomið, við úthlutun framlags fyrir næsta skólaár.

6. gr.

Langtímaforföll

Sveitarfélagi er heimilt að sækja sérstaklega um aukaframlag vegna langtímaforfalla kennara á miðstigi í söng og á framhaldsstigi í söng og hljóðfæragreinum, sem standa lengur en einn mánuð enda liggi fyrir læknisvottorð. Heildarframlag verður þó aldrei hærra en sem nemur raunverulegum launakostnaði skólans vegna forfalla á því tímabili sem um ræðir.

Umsókn frá sveitarfélagi um framlag samkvæmt þessari grein skal berast til Jöfnunarsjóðs sveitarfélaga fyrir 15. júní ár hvert.

7. gr.

*Framlög vegna nemenda á grunnstigi
og nemenda á miðstigi í hljóðfæragreinum*

Jöfnunarsjóði sveitarfélaga er heimilt að veita sveitarfélögum framlög vegna nemenda sem þurfa af gildum ástæðum að sækja tónlistarskóla utan síns sveitarfélags. Skilyrði er að fyrir liggi staðfesting um að námið verði metið til eininga í framhaldsskóla.

Úthlutun framlaga samkvæmt þessari grein takmarkast af því hve mikið fjármagn jöfnunarsjóður hefur aflögu til ráðstöfunar að teknu tilliti til framlaga skv. 4. og 6. gr. Við ákvörðun framlaga skal umsóknum forgangsraðað í eftirfarandi röð:

1. Nemendur á miðstigi í hljóðfæragreinum
2. Nemendur á grunnstigi í söng eða hljóðfæragreinum, þ.e. nemendur sem hafa verið í tónlistarnámi á grunnstigi í eitt skólaár eða lengur
3. Nemendur sem eru að hefja nám á grunnstigi í söng.

Úthlutun framlög vegna samþykktara umsókna samkvæmt þessari grein skulu að hámarki nema helmingi af viðmiðunarfjárhæð en hlutfallið getur lækkað ef eftirspurn er umfram það fjármagn sem er til ráðstöfunar skv. 2. mgr. Sveitarfélag sem sækir um framlag greiðir þann hluta kennslukostnaðar sem út af stendur. Tónlistarskólar skulu gæta þess að samþykki lögheimilissveitarfélags liggi fyrir vegna nemenda sem uppfylla skilyrði skv. 1. og 2. mgr., áður en þeir eru innritaðir í tónlistarnám.

Um umsóknir, greiðslu framlaga og leiðréttingu áætlaðra framlaga fer skv. 3.-5. gr. eftir því sem við á, sbr. þó ákvæði til bráðabirgða. Jöfnunarsjóður skal senda lögheimilissveitarfélögum tilkynningu um áætluð framlög samkvæmt þessari grein fyrir 15. júlí ár hvert, sbr. þó ákvæði til bráðabirgða.

8. gr.

Gildistími

Reglur þessar eru settar á grundvelli samkomulags ríkisins og sveitarfélaga frá 13. maí 2011 um eflingu tónlistarnáms og jöfnun á aðstöðumun nemenda. Gildistími regnanna er frá 1. júlí 2011 til 31. ágúst 2013.

Ákvæði til bráðabirgða.

1. Þrátt fyrir ákvæði í 2. og 3. mgr. 3. gr. ber sveitarfélögum að skila umsóknum vegna skólaársins 2011 – 2012 til Jöfnunarsjóðs sveitarfélaga eigi síðar en 30. september 2011. Skulu þær byggðar á upplýsingum frá tónlistarskólum um endanlega nemendaskrá, sbr. 4. mgr. 3. gr.
2. Þrátt fyrir ákvæði í 3. mgr. 4. gr. og 4. mgr. 7. gr. munu upplýsingar um úthlutanir framlaga úr Jöfnunarsjóði sveitarfélaga fyrir skólaárið 2011 – 2012 liggja fyrir eigi síðar en 31. október 2011.
3. Þrátt fyrir ákvæði í 2. mgr. 4. gr. munu framlög úr Jöfnunarsjóði vegna mánaðanna júlí, ágúst og september koma til greiðslu 31. október 2011 ásamt greiðslu vegna októbermánaðar.

Innanríkisráðuneytinu 31. ágúst 2011.

Ögmundur Jónasson



Ragnhildur Hjaltadóttir

Ragnhildur Hjaltadóttir